

## PRAN WAN LADAW HTA LABAN 2

January 19, 2020

### CHYUM MUNGGA DAW 1

Esaia 49:3, 5-6

*Ya hti na gaw myihtoi Esaia a laika hta na rai nga ai.*

Madu Karai Kasang gaw, Israela e, nang gaw nye a shangun ma rai nga ndai; na a marang e nye a hpung shingkang madun dan nga nngai, nga nna ngai Esaia hpe Madu tsun wu ai. Shingrai ngai gaw, Madu a man e arawng sadang lu ai hte, nye a Karai Kasang gaw nye a n-gun tai wa nu ai. Yaku a amyu hpe shi Madu hpaning de bai wa shangun na hte, Israela masha ni hpe shi kaw bai jahpawng shinggyin na Madu gaw, ya ning nga ai: Yaku a amyu ni hpe bai sharawt nna, naw ngam nga ai Israela masha ni hpe bai woi wa na matu, nang nye a shangun ma tai ai gaw, na a matu amu kaji naw rai nga ai. Maigan amyu ni a nhtoi tai na hte, lamu ga htum hkra nye a hkye hkrang la ai lam tai na matu, ngai nang hpe naw san da na nngai.

*Ya hti ai gaw Karai Kasang a mungga rai nga ai.*

### CHYUM MUNGGA DAW 2

1 Korinhtu 1:1-3

*Ya hti na gaw Korinhtu masha ni hpaning de San Pawlu shagun dat ai laika langai hta na rai nga ai.*

Tsawra la ai hpu nau ni e, Karai Kasang myit ra ai hte maren, Yesu Hkristu a kasa tai na shaga la hkrum ai ngai Pawlu hte, anhte a hpu nau wa Soshtenu gaw, Korinhtu mare na Karai Kasang a amyu masha ni hpe ga shana dat ga ai. Nanhte gaw Hkristu hta e shachyoi shapra ai hkrum nna, shara magup e anhte a Madu Yesu Hkristu kaw akyu hpyi ai ni yawng hte rau, Karai Kasang a chyoai pra ai amyu masha ni tai na matu, shaga la hkrum ai ni rai nga myit dai; hpa majaw nga yang, dai Yesu Hkristu gaw nanhte a Madu rai nga ai hte maren, shanhte a Madu mung rai nga malu ai. Anhte a Wa Karai Kasang hte Madu YesuHkristu kaw na, chyeju hte ngwi pyaw ai gaw, nanhte hta e nga nga malit ga law.

*Ya hti ai gaw Karai Kasang a mungga rai nga ai.*

### KABU GARA SHIGA

Yawhan 1:29-34

*Ya hti na gaw Yawhan a laika hta na Kabu Gara Shiga rai nga ai.*

Yawhan gaw shi hpaning de Yesu sa wa ai hpe hkap mu yang, shawa masha ni hpe tsun mu ai gaw: wora de mada yu mu; dai wa gaw mungkan mara la kau ya ai. Karai a Sagu Kasha rai nga ai. Ngai hta grau galu kaba ai wa langai mi, nye a hpaning e du na ra ai; kaning rai nme nga yang, ngai garai n shangai yang shi nga nga sai, ngu nna ngai tsun ai wa gaw, ndai wa rai nga ai. Ngai gaw shi kadai re ai mung n chye nngai; rai timung, Israela masha ni a man e shi hpe madun dan na matu ngai sa du nna, hka hte kashin kamun jaw nga ai,

ngu nna Yawhan tsun wu ai. Dai hta kaga Yawhan gaw, dai Wenyi gaw uhkru du zawn sumsing lamu de nna yu hkrat wa ai hpe ngai mu se ai: dai Wenyi mung shi a ntsa e dung nga ai. Ngai gaw shi kadai re ai hpe n chye nngai; rai timung, ngai hpe, hka hta kashin kamun jaw shangun dat ai wa ngai hpe tsun ai gaw: kadai a ntsa de dai Wenyi yu hkrat wa nna a nga nga ai hpe nang mu jang, dai wa gaw Chyoi pra ai Wenyi hte kashin kamun jaw ai wa rai nga ai. Dai hte maren ngai mu se ai rai nna, ndai wa gaw Karai Kasang lata san da ai wa rai nga ai, nga nna sakse hkam wa ai, ngu nna Yawhan gaw shawa masha ni hpe tsun shadum wu ai.

*Ya hti ai gaw Madu a Kabu Gara shiga rai nga ai.*